

## lis Gnovis

■ **PRAVISDOMINI.** «O sin i popui ch'a vivin in pàs»

La scuele al è il puest just par imparà la noviolence, «ancje cuant che si à di studià la vuere. Che anzit, salacor propit pal fat che a scuele si à di studià ancje lis vueris e pal fat ch'a 'nd è cualchidun ch'al impare a vergognâsi pai tancj di lôr che, tes etis passadis, a àn falât doprant la violence». Partint di chestis considerazions, la Scuele secundarie di Pravidomini, dai 25 di Fevrâr, e à tacât a meti fûr la bandiere de pàs e po, ai 21 di Març, prin di de Vierte, e à celebrât il repudi de vuere, sunant l'imni europeu e fasint svoletâ lis bandieris di ducj i popui ch'a son rapresentâts tal istitût, dulà che si dan dongje 93 fruts, 18 insegnants, dôs colaboradoris e 16 nazionalitâts: talians/furlans, albanês, rumens, grêcs, bosgnacs, macedonians, rus, ucraïns, marochins, palestinês, indians, sikh, rom, cilens, argjentinis e brasilians.



■ **UDIN.** 70 agns cu «La Patrie»

Ai 25 di Març, il sfuei «La Patrie dal Friûl», fondât di Felix Marchi e di pre' Josef Marchet ai 24 di Fevrâr dal 1946, al à immaneât une fiestone a Udin, par celebrâ 70 agns d'informazion autonomiste par furlan. Li dal teatri «San Zorç» in Borc di Greçan, si son dâts dongje colaboradôrs, artiscj e operadôrs culturâi par confermâ il sproc: «Stin dongje a le Patrie». «Al à stât un onôr par nô – al à comentât il president de clape di culture ch'e fâs di editôr dal sfuei, Andrea Valcic – vè otignût une rispueste cussi positive di artiscj ch'a son la flôr de culture in Friûl e ch'a pandin la sô professionalitât par furlan». Intant de serade, a son intervignûts, cun Erika Adami e Walter Tomada ch'a àn fat di presentadôrs, Angelo Floramo, il «Teatro Incerto» di Claudio Moretti, di Elvio Scruzzi e di Fabiano Fantini, «Ostarie Contecurte», Dj Tubet, Leo Virgili e Nicole Coceancig, Federico Vicario e Eros Cislino.

■ **TRENT.** Il lessic de autonomie

Par dut il 2022, il Trentin al memorearà il L inovâl dal so secont statût di autonomie, fat bon vie pal 1972. Cul jutori de Fondazione «Museo storico del Trentino», la Provincie e à prontât un program di convignis, di seminaris, di mostris e di publicazions e di ativitâts pes scuelis. Fra lis publicazions, a saltaran fûr «Il Lessico dell'Autonomia» (tal mès di Setembar) e un'antologjie di «grandi testi dell'autonomismo trentino» (fra 2022 e 2023).

■ **BRUSSEL.** Un «Premi Oscar» pai produtôrs biologjics

Stant che ai 23 di Setembar, e cole la «Zornade dal biologjic», la Comission europeane, parie cul Comitât economic e sociâl «Cese», cul Comitât des regions «CdR», cul «Copa-Cogeca» e cun «Ifoam Organics Europe», e à stabilît d'inmanèa i «EU Organic Awards», par dâi seont a lis indicazions dal «Plan di azion Ue pal biologjic». I candidâts a varan di jessi presentâts dentri dai 8 di Jugn, motivant cemût ch'a intindin di miorâ l'economicità e l'accessibilitât dai prodots biologjics te Union. Il regolament dal premi al previôt 7 categoriis: miôr contadin biologjic; miôr regjon biologjiche; miôr citât biologjiche; miôr biodistret biologjic; miôr picule imprese biologjiche; miôr buteghir di mangjative biologjiche; miôr ristorant biologjic.

Mercus 13	Miercus sant	Domenie 17	Pasche Maiôr
Joibe 14	Joibe sant	Lunis 18	Lunis di Pasche
Vinars 15	Vinars sant	Martars 19	Martars di Pasche
Sabide 16	Sabide sant	Il timp	Timp ancjemò incert



**Il soreli**  
Ai 13 al jeve aes 6.25  
e al va a mont aes 19.51.



**La lune**  
Ai 16 Lune plene.

**Il proverbi**  
Nadâl al zûc e Pasche dongje dal fûc.  
**Lis voris dal mès**  
Bagnait ben ogni di ce che al covente, e visaitis di spandi ledan. Rari lis plantis cressudis masse fissis, tant che salatis e spinazis.

# La Spiritualitât ecologjiche

Lis Propuestis  
di «Movimento Laudato si'»  
e «Aggiornamenti Sociali»

«Intune ete segnade de crisi ecologjiche, ancje la spiritualitât e scuen svilupâ imprescj gnûfs par dâi un significât a lis trasformazions de vite umane, ch'e je menaçade simpri plui de degradazion dai ecosistemis, de division cressint fra Nord e Sud dal mont e dal moltiplicâsi dai disastri climatics»: une rispueste positive a cheste dibisugne a son daûr a ufrile, cun creativitât e cun determinazion, di une bande il «Movimento Laudato si'», ch'al è une rêt catolice mondiâl cun passe 700 organizazions, e di chê altre la riviste «Aggiornamenti sociali», nassude dal 1950 e puartade indevant de colaborazion fra lis Comunitâts dai Jesuits di Milan e di Palermo. Dai 20 di Avrîl ai 11 di Mai, il «Movimento Laudato si'» (<https://laudatosimovement.org/it/homepage-original-4/>) al tome a proponi il cors anuâl par «Animatori Laudato si'», tant a di par chei cristians ch'a intindin di rispuindi a la «clamade de Glesie a curâ il Creât», metint in vore l'Ecologjie integrâl che Pape Francesc al à presentât come element qualificant e impreteribil de «Dutrine social». In zornade di vuê, a son bielzà 9 mil i Animadôrs formâts in cent e 13 Paîs di ducj i continents e impegnâts intal percors di formazion spirituâl pe «Conversion ecologjiche», personâl e comuni-



La rêt dai «Animadôrs Laudato si'» e lee, in 113 Paîs, 9 mil cristians

Ecologjie integrâl:  
un paradigma  
di justizie,  
un percors  
spirituâl,  
un mût di vivi

tarie, cun 2 mil e 600 di lôr atîfs tes Glesiis talianis. Lis lezioni a saran proponudis su la rêt des rêts, in 4 sessions (Viodi/Il berli de Tere e il berli dai puars; Judicâ/La Laudato si': fondis teologjichis par dicemi i segnacui dai tîmps; Operâ/La conversion ecologjiche, personâl e comunitarie). Il titul dal cors di chest an al è: «Shemà Israel! - Ascolta, Israele / Ascoltare con l'orecchio del cuore», stant che la propueste e jentre adimplen tal spirt de Sinode mondiâl su la sinodalitât. I «Animadôrs Laudato si'», di fat, a cjapin sù l'impegn di «scoltâ il berli dai puars e de tere», ma ancje il dovê di judâ la Gle-

sie universâl a diventâ «sacrament di curie», tun mont ch'al à bisugne streme di jessi curât dai siei malans sociâi, spirituâi e ambientâi. La riviste «Aggiornamenti Sociali», par fâ ancje jè la part dal so dovê, e à proferit su la rêt des rêts il «Dossier Laudato si'», dulà ch'a son ordenadis dutis lis risorsis e i profundiments su la spiritualitât ecologjiche publicâts tai ultins agns (articui, saçs, libris, intervistis...), ma ancje gjavâts fra lis contribuzions produsudis de rêt internazionâl dai Jesuits. Lis sezions dal «Dossier» a son intituladis: «Per iniziare», «Chiavi di lettura», «Allargare lo sguardo», «Multimedia», «Dal mondo» e «Leggi l'enciclica». Ducj chei che si vicinin a cheste propueste a varan l'oportunitât di decidi ancje se notâsi a l'iniziativa dai «Esercizis spirituâi su l'Ecologjie integrâl», programâts a Bologne dai 25 ai 29 di Mai, cul jutori di «Villa San Giuseppe» ([www.aggiornamentisociali.it/archivi/AGSO/files/00LocandinaBologna.pdf](http://www.aggiornamentisociali.it/archivi/AGSO/files/00LocandinaBologna.pdf)). Il percors di preiere e di riflessione, seont il stîl di Sant Ignazi di Loyola, al sarâ intitulât «Ecologjie integrâl: un paradigma di justizie, un percors spirituâl, un mût di vivi».

Mario Zili

## Martignà: il concors «La peraule dal cûr» in mostre

La Scuele paritarie «D. B. Coradazzi» di Vile Santine par «Scolte», te categorie «Poesie inedite», e Alessio Compagno par «Cumbinin», te categorie «Peraule», a son i vincidôrs dal concors «La peraule dal cûr», organizât di «Città Fiera», cul jutori de agenzie regionâl «ARLeF». La cerimonie de premiazion e je stade fate ai 9 di Avrîl, cuant ch'e je stade screade la mostre dedicate al premi, imbastide cul jutori dai students di «al Fvg». Cui doi vincidôrs, a son stâts segnalâts altris 11 lavôrs, che seont il zuri a àn meretât «menzioni speciali».



## Peraulis in dismentie

par cure di Mario Martinis

### VERMENE

s.f. = vermena, virgulto  
(dal latino *verbēna*, utilizzato al plurale; voce panromanza, da un determinato periodo storico è nome generico di erbe o fronde di carattere sacro come l'alloro, e l'olivo)  
Chest an tal broilli al è plen di vermenis.  
Quest'anno il podere è colmo di virgulti.

### VERGONZE

s.f. = vergogna  
(forma indigena dal latino *verecundia* "vergogna")  
Ce vergonze che o ai dopo chel che mi à dit!  
Che vergogna ho dopo quello che mi ha detto!

### VIDIÇ

s.m. = viticcio  
(dal latino *\*vītīceus* "di vite", da *vītis* "vite")  
Cjapin sù lis fassinis di vidiç.  
Raccogliamo le fascine di viticcio.

### VIDIDULE

s.f. = convolvolo  
(da confrontare con il latino *vītūlāmēn* "quantità di germogli" e *vītīcula* "piancicella di vite")  
Sul ôr de taviele a cressin dome vididulis.  
Sul bordo della campagna coltivata crescono i convolvoli.

### VIELI

s.m. e agg. = vecchio (riferito a persona)  
(dal latino *tardo veclus*, per *vetulus*, diminutivo di *vetus* "vecchio")  
Al è vieli come un cuc.  
È vecchissimo.

### VIERI

agg. = vecchio (riferito alla cosa)  
(variante di *vieli*, da *vetulus*, diminutivo di *vetus* "vecchio")  
Benedet che al sei l'amôr vieri, che mi sta simpri tal cuc.  
Benedetto sia il primo amore, che mi sta sempre nel cuore.